

Nuummi Imarsiornermik Ilinniarfimmum ininik attartuinnarani, Namminersorlutik Oqartussat tassunga illussamik sanatitsigunik, piginnittuugunillu siunissamut ungasinnerusumut naleqqunnerussanersoq pillugu nassuiaasiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Attartuinnarnermut nallersuullugu piginnittuunermi aningaasatigut, allaffissornikkullu kingunissaannik nassuiaat misissueqqissaarnertaqassaaq.

(Inatsisartunut ilaasortaq Bo Martinsen, Demokraatit)

Akissuteqaat

(Ilinniarfitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerpeqarnera

Naalakkersuisut Kultureqarnermut, Ilinniarfitaanermut, Iisimatusarnermut Ilageeqarnermullu Ataatsimiititaliap sulillaarsimaneranut isumaliutissiissuteqarneranullu qujapput.

Naalakkersuisut ataatsimiititaliaq isumaqatigaat, siunissami ungasinnerusumi Imarsiornermik Ilinniarfiup inissaqarnikkut naapertuuttumik aaqqiisoqarnissaanut atatillugu nassuiaat Inatsisartut naliliinissaannut iluaqutaassasoq. Avataaniit aningaasalersuinissamut, ilaatigut aningaasaateqarfinit aningaasalersuinissamut, periarfissat misissornissaat ataatsimiititaliamit kaammattuutigineqartoq Naalakkersuisunit maluginiarneqarpoq, taamatuttaarlu Namminersorlutik Oqartussat ilinniarfitaanermut pikkorissartitsinermullu illuutaat pioreersut sapinngisamik atorneqartarnissaannut kissaat aamma maluginiarneqarluni.

Tamakku saniatigut ataatsimiititaliami amerlanerussuteqartut Naalakkersuisunut kaammattuipput, ilinniarfiit attartuinnermut aningaasartuutaat tassungalu aningaasartuutit tamarmiusut pillugit kingusinnerpaamik UKA2027-mut nassuiaasiortoqassasoq. Naalakkersuisut kaammattuut malinniarpaat.

Taamatut oqaaseqarluta Naalakkersuisut aalajangiiffigisassatut siunnersuut akuersissutigineqassasoq inassutigaaq.